

DOMENIE XXX «VIE PAL AN»

Jutoris pe Liturgjie

Domenie, ai 29 di Otubar dal 2017

La liturgjie di vuê nus cjacare di volê ben. L'amôr nol ven ni dai cors di scuele, ni dai gjornâi, ni de television, ni di internet, ni dai libris di teologjie, ni de catechesi. Di fat l'amôr al è za dentri di nô parcè che Diu al creà l'om sul so stamp e Diu al è amôr (Gjen 1, 27; 1 Zn 4, 8).

E pues amâ, la persone che e à fate esperience concrete di amôr, prime ricevût e dopo regalât. Scuele primarie di amôr e je - o e varès di sedi - la famê cul so mût di vivi e di condividi dentri e fûr di cjase. E comence li la esperience di amôr che ti puartarà tai agns a la stime di te, al rispjet dal prossim, al dialic te libertât, a superâ lis dificoltàts tune afetivitât simpri plui madure, responsabile e di compassion.

Tal vanzeli di vue dut chest al ven compendiât tal Tu amarâs il Signôr - Tu amarâs il to prossim, che no son une leç o un contrat, ma l'anime dal vivi insiemi. Il cristian al à la furtune di madurâ tal amôr cjaminant sul troi tai insegnaments de vite di Gjesù.

Antifone di jentrade

Sal 104,3-4

Che il cûr si indalegri di ducj chei ch'a van cirint il Signôr.
Cirît il Signôr e la sô potence;
cirît di un continui la sô muse.

Colete

Diu onipotent e eterni,
fasinus cressi la fede, la sperance e la caritât,
e, par podê vê ce che tu imprometis,
fasinus volê ben a ce che tu nus comandis.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Es 22,20-26

Se ur fasarês malegraciis a la vedue e al vuarfin mi vignarà sù la fumate cuintri di vualtris.

Une volte intuît che la fonde di dut e je l'amôr, ogni popul te sô esperience e culture al met des leçs e des regulis par salvaguardâ il ben de int. Cheste prime leture e je antigone, e aparten al Codiç de Aleance, a la Costituzion dal popul di Israel. Il voli dal legjisladôr al è atent in mût dal dut particolâr al forest a la vedue, al vuarfin, al puar, a lis personis plui a riscjio. Smenteâsi di lôr o spreseâju al è come smenteâ o spreseâ il Signôr in persone.

La nestre societât no vignarà judicade de storie e di Diu pal ben jessi economc che e à, ma dal mût di tratâ lis ultimis categoriis de int, che, al semee, a stan aumentant in piês e calant in miôr. Se chest al è vêr o vivin un progrès fals, cence umanitât, e o sin fûr dai parametris de civiltât.

Che no nus tocjii, informâts su dut, di dismenteâ il plui impuartant: i tribulâts che o vin dongje e i ultims dal nestri popul.

Dal libri dal Esodo

Cussi al dîs il Signôr: «No sta fâi malegraciis al forest e no sta tibiâlu, parcè che ancje vualtris o vês stât forescj te tiere dal Egjit.

No stait a maltratâ une vedue o un vuarfin. Se tu i fasis malegraciis e lui al berle viers di me, jo o scoltarai il so berli; mi vignarà sù la fumate e us fasarai murî cu la spade: cussì lis vuestris feminis a restaran veduis e i vuestris fîs vuarfins.

Se tu i imprestis bêçs a di un de tô gjernazie, al pûar ch'al è a stâ cun te, no sta fâ cun lui compagn di chel ch'al impignore; no sta pratindi nissun interès. Se tu cjolis in pegn la manteline di un altri, tu âs di tornâje cuant che il soreli al va a mont. Al à dome chê par taponâsi, e je la manteline che si invuluce: cun ce aial di pognisi? S'al berle viers di me, jo lu scoltarai, parcè che jo o ai cûr». Peraule di Diu.

SALM RESPONSORIÂL

dal Salm 17

Culî il salm - te Bibie si cjate al n. 18 dal Salteri - al è ridusût a pocjiis riis che no rivin a dânus la bielege epiche dal originâl. Nus visin però che Diu si è metût de bande dal tribulât, lu à difindût e lu a salvât.

Se te nestre vite o vin sperimentât il jutori dal Signôr, cheste preiere e je ancje la nestre e o podìn dî cul cûr:

R. Ti vœi ben, Signôr, che tu sês la mê fuarce.

Se cjantât: Il cjant dai salms responsoriâi, p. 80.

Signôr, mê crete, gno salvament e mê fuartece;
gno Diu, crete là ch'o voi a parâmi;
gno scût, potence che mi salve. **R.**

O ai clamât il Signôr
e le ai scapolade dai miei nemîs.
Vive il Signôr e benedete la mê crete,
ch'al sedi laudât chel Diu che mi à dât jutori. **R.**

SECONDE LETURE

1 Ts 1,5-10

Si sês convertîts, slontanantsi dai idui, par servî il Diu vîf e vêr e spietâ dai cîi so Fi.

Podessial chest tocût di letare jessi tornât a scrivi e spedît ae int dai paîs che ormai a son cence predi. Podê cambiâ dome i nons dai lûcs gjeografics par trasferîju in localitâts e comunitâts dal nestri Friûl; podê dî dai batiâts, dai cristians, dai laics, oms e feminis: midiant di vualtris, di fat, la perauale dal Signôr...

Utopie? Ma ancje la utopie, cu la gracie dal Signôr e la nestre buine volontât, e pues diventâ realtât.

De prime letare di san Pauli apuestul ai Tessalonicês

Fradis, o savês cemût che si sin compuartâts framieç di vualtris pal vuestri ben. E vualtris o vês copiât di nô e dal Signôr, acetant la perauale framieç di tantis tribulazions ma cu la gjonde dal Spirtu Sant, che di fat o sês diventâts un spieli par ducj i fedêi de Macedonie e de Acaie. Midiant di vualtris, di fat, la perauale dal Signôr e à rimbombât no dome in Macedonie e in Acaie ma la innomine de vuestre fede in Diu si è slargjade pardut, di mût che nol covente che nô int fevelin. Di fat e je la int stesse ch'e fevele dal acet che nus vês fat e di cemût che dai idui si sês convertîts a Diu par servî il Diu vîf e vêr e par spietâ dai cîi so Fi ch'al è resussitât dai muarts, Gjesù, che nus libere dal svindic ch'al sta par rivâ.
Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,

parcè che ai piçui tu âs palesât i misteris dal ream dai cîi.

R. Aleluia.

VANZELI Mt 22,34-40

Tu amarâs il Signôr to Diu e il prossim come te in persone.

Ogni toc di vanzeli, o vin di metilu tal so ambient. Culi o vin di capî: Cui che al da la rispueste, a di cui che le da, ce moment che lui al sta passant e ce che i tocjarà pal so insegnament. Cui: Gjesù, il nestri mestri; a di cui: a un espert di leç, esponent dai fariseos che a ponevin la lôr spiritualitât te gjerarchie di 613 leçs; in ce moment: cuant che lis domandis a jerin conzegnadis par podêlu acusâ e copâ; cemût che al metarà in pratiche: paiant chescj doi comandaments cu la condane cence apel fin al patibul infamant de crôs. Di fat, il culmin dal Tu amarâs il to Diu - tu amarâs il to prossim, li che il secont comandament al è compagn dal prin, al varà il colm te ultime cene cuant che Gjesù al disarà: chest al è il gno cuarp dât vie par vualtris - chest al è il gno sanc spandût par vualtris (cf. Lc 22, 19-20).

I doi comandaments nuie a cjolin al amôr uman, anzit a àn la lôr fondamente tal amôr uman. O vin dome di incjarnâju simpri in miôr imparant di Gjesù, parcè che, ancje tal judâ a volê ben, dome un al è il vuestri mestri, il Crist (cf. 23, 28-12).

Dal vanzeli seont Matieu

In chê volte, i fariseos, savût che Gjesù al veve fat tasê i saduceos, si derin dongje ducj e un di lôr, espert di leç, lu interpelà par metilu a lis provis: «Mestri, cuâl esal il comandament plui grant de leç?». I rispuindè: «Tu amarâs il Signôr to Diu cun dut il to cûr, cun dute la tô anime e cun dutis lis tôs fuarcis. Chest al è il plui grant e il prin dai comandaments. Ma il secont al è compagn di chel: Tu amarâs il to prossim come te in persone. Di chescj doi comandaments e dipent dute la Leç e i Profetis». Peraule dal Signôr.

Su lis ufiertis

Cjale di bon voli, Signôr,
i regâi ch'ò presentin a la tô maiestât,
par che l'ufierte dai tiei servidôrs
e ledi sù viers de tô glorie.
Par Crist nestri Signôr.

Antifone a la comunion

Si indalegrarin de tô vitorie
e o gjoldarin tal non dal nestri Diu.

cf. Sal 19,6

O ben: cf. Ef 5,2

Crist nus à volût ben e si è ufiert par nô,
ufierte e sacrifici a Diu plen di bon odôr.

Daspò de comunion

I tiei sacraments, Signôr,
ch'a operin in nô ce ch'a significhin,
par ch'ò podìn gjoldi te plenece de veretât
ce che cumò o fasin in maniere velade.
Par Crist nestri Signôr.

* * *

E ce sorte di mestri chel dal vanseli di vuê che nol saveve nancje il comandament plui grant de leç! Ma no lu à domandât par savê, par imparâ, par meti in pratiche. Lu à fat dome par tindij une palisse, par viodi se il Signôr al meteve par prin Diu, mostrantsi cun pôc cûr pai oms, o ben i oms, lassant di bande Diu.

Nol jere il prin câs che Gjesù si cjatave devant di cheste int rissolude a imbroiâlu...

Vanseli par un popul, an A, p. 208

* * *

Sante messe e Eucaristie, rîts, preieris, cjants: Hosanna pp. 34 - 119.

* * *

*I cristians si son adatâts cun masse facilitât
a dâi reson, riverî e venerâ il plui fuart.
A varessin di diventâ personis di grinte e di scandul,
metintsi cun tante plui decision de bande dal debil.*

Dietrich Bonhoeffer

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*